

四庫全書

集部

欽定四庫全書

秋澗集卷五十九

元 王惲 撰

碑

大元國衛輝路創建三皇廟碑銘

伏羲神農黃
帝舊為醫家

所 奉

衛之廟祀三皇權輿於國初醫家者流因城隍祠右故
壇屋而像之庸申歲時瞻仰之懇然位置迫隘規制卑

陋不足以安靈揭虔為神明觀府監尹達實特穆爾顧其如是蹶然於中私自念言當尊而侈大之心有所在而時則未遑也伏承登極詔條聖帝明王守吏致祭廟宇傾圯官為修葺至大德庚子歲夏仲祠部頒降三皇禮秩以春秋二時享獻蓋宗本醫學拯恤元元也而昔構不稱安能儼肅禮容光昭祀典哉侯乃咨謀于僚屬曰明詔所當寅奉民力不可妨奪工匠不可徒役公帑不敢擅發也當首出俸稍以為倡率少尹帕克斯巴因判

寮高興仁推官馮琚相與贊襄下逮屬吏醫師箠士從
風皆靡聿來胥宇於是相治城北郭汲署故址與朗方
正奠敬神居經始於是歲冬孟斷手於明年季夏為禮
殿三巨棟松栢旅楹奕奕挺烏望雲就日儼若帝者之
所其臺門洎醫學講堂齋室以次修舉其秋因常禋禮
奉安神棲儀物肅備薦獻通暢士民來觀歡忻贊嘆謀
斷石紀蹟傳示方來持學正初伯易事狀以修建碑銘
為請不肖念鄉榆盛事其敢以衰耄辭夫德高太上者

宜垂不朽之名澤及萬世者當享天下之祀鴻荒肇判
為生民害者多矣三聖繼作觀象化民創物垂範如畫
八卦以通天地之情造書契以代結繩之政耒耜以資
耕耨舟楫以濟不通衣裳宮室既厚其生棺槨斂葬復
卹其死交貨賄而易有無制弧矢以威強暴然後民得
安居以粒食優游以卒歲孔子繫易叙太皞神農軒轅
氏功德如此其見于醫家說者謂神農氏一日嚼嚙物
毒七十餘種軒岐論難本乎大道而究乎死生之奧故

近代猥為主祀若以三聖人開天建極利生民而仁後
世者論之特一事爾在沂流求源雖出於人心之至情
而報本反始乃有國之令典按歷代祀秩曰皇曰帝惟
唐嘗置廟京師餘雖舉祭定於故都三年一祭而已我
國家掃欃槍以清華夏斷鰲足以立四極還淳返樸崇
德尚功三年故都之祀亦嘗舉行迨聖天子當寧道嬾
生成仁含動植祗嚴忠祠克作神主開建醫學德洽好
生故有司推廣睿意俾同通祀致祠廟徧于天下其敬

恭之典越至矣乎伊守土臣奉承唯謹規為有方不傷財不役民未及閱歲而起百年偉觀事神治人可謂能也已
是宜銘銘曰

林林總總厥初民生理具畫一七鑒方萌乾端坤倪軒豁露呈孰措其一底於和平聰明惟亶體用含弘三聖繼作見天地情裁成功化以逸以寧躋民仁壽萬世稱仁德至孰邁道大難名功同元化罔知中行推原報本任理攸應大德之政思治幽明在在通祀尊隆莫京惟

守土吏恪於奉承載敬新廟閔安神靈聖靈在天與時
降升雲行雨施品物咸亨云何事神而瘠于氓翼翼禮
殿有儼神庭民初不預吏亟經營維皇降止庶監嚴誠
風雨時若歲事屢登民浸福澤豈曰吏能謹夫歲月爰
勒斯銘事神治人績用昭稱煌煌麗石永垂頌聲

碑陰先友記

曹居一字通甫北燕人有文章善談議以謨畫佐征南
幕府官員外郎卒

劉祁字京叔渾源人資純粹早以文章擅名有神川遜士集行于世弟郁以篆隸真行名家終監察御史

牛天祥字國瑞上黨人深天文武經學歷恒山公府講議官應東諸侯聘客死聊城

孟道字伯達瑯邪人性沉毅有機果威儀抑抑以學業顯東海

趙澄字公靖共城人性純古有儒行終衛州教授

司之才字進道淇門人業詞科有聲場屋間性峭直有

口

盧武賢字叔賢燕人資雄俊意談兵以客卿游諸侯間王之綱字德柔湯陰人通世務以儒術緣吏事有鹽鐵諸論傳于相下

邢敏字公達秦人性公直明法令以廉自持用薦授左司員外郎終大名府判官

李貞字彥祥黎陽人先考同年吏員轉尚書戶部掾性溫粹以善淑稱

釋朗秀廩延人行精嚴內典外五經子史無不究覽逮
耄期不倦示滅衛之仁化寺

楊果字正卿蒲陰人詞賦第歷劇縣皆有能聲文采風
流照映一世拜叅知政事終懷益路總管

董瀛字巨源廉臺人精力有幹局常從王濬南問學今
為淮東按察使

董民譽字端卿陽夏人詞賦第為人渾厚無圭角與時
浮沈常叅預江漢都督府事

劉方字元卿陵川人性清古善歌詩終衛輝路提學

宰沂字魯伯洛陽人才長氣豪抱負奇節嘗與中書楊維說降西山主帥時人壯之後為王府徵士

張豸字義大相人性僻直數從事郡府少不合輒望望棄去

趙鵬字搏霄蒲陰人純粹有耆舊風金詞賦進士用辟舉令泌陽以廉能稱

持嘉德玉字君寶蓋州人性至孝與人交剴悌篤信義

嘗與友共事惡其不直遂絕而不較

勾龍瀛字英孺河南人性方直在河南有詩聲述姓譜
行於世

烏庫哩貞字正卿遼東人沈毅果敢用蔭任內侍官得
幸北渡後薄顯仕於去就不屑

周惠字德甫隰州人性慷慨有大志早貴幸樂與賢士
夫遊終江淮都轉運使

王昌齡字顯之滄州人蘊藉有經濟才由叅議史忠武

府知衛州有惠政

李瑞字天祥汲人性強果重義急難凜古人風達吏務有調議於先考執弟子禮終身焉仕至潞州判官

王贊字子襄登封人性直諒生平游元劉間好詩學

劉沖字進之太原人性剛克敦友義嗜學安貧樂道人善事與心會激節感慨有幽并豪傑氣尤長於左氏春秋

馬寅字致遠許州人性雅重嗜古學恬於仕進

丁居實字仲華錦州人用蔭以吏起身有廉德北渡後以前代掌故授禮部郎中致仕

馬佐字佐之滄州人金明昌太學生有賦聲

完顏孟陽字和之遼東人用門資起身為部掾北渡後不仕好古書家藏至千餘卷

沈侃字和卿魏人資端方精律學嚴而疾惡由憲臺司法調陵州倅致仕

張善淵字機道譙人少為黃冠師性機警有幹局表表

為玄門綱

王磐字文炳永年人經義第一人品高邁儀範一世文章
精極理要臨大節不可奪今為翰林學士承旨

圖克坦公履字雲甫遼海人經義第學問該貫善持論世
以通儒歸之性純孝樂誨人官至侍講學士
陶諒字信之獲呂人有吏幹歷邑長著能稱

程和字仲美武涉人長管庫材以聚書教子為志竟莫
遂而沒哀哉

胡璉字國瑞武安人詞賦第為人慈祥樂易風流偉德
度子祇適有俊材光大其先業

朱萬齡字壽之雲夢人生平以道學自負星厯占筮乃
其所長

楊弘道字叔能淄川人氣高古不事舉業磊落有大志
文章極自得之趣有小亨集行于世

王信字信之南燕人少為律吏美丰儀嗜酒有氣義

李班字晉伯北燕人性介特以品官子補部掾

趙非熊字周卿安陽人貞祐間嘗以材武選為春官衛
率為人資嚴厚可任以重事

長樂阡表

并序

汲郡王氏其先河南陽武縣圉亭人避靖康之亂北渡
河至汲樂其風土衍沃遂占籍為長樂鄉西晉里人今
墟落南原纍纍而阜者蓋自肇遷以來丘壠也族衍代
深法不可溝合率藁殯兆外時我曾祖府君以大宗子
觀其然而歎曰禮當改卜新阡為王氏第二塋明靈其

舍諸况責實在我乎於是擇葬而東得地於第四疇清溝之北自禰而上三世合羣從凡厝者廿餘窆其紹已絕而力弗逮者率棺衾畢具遠近聚觀莫不欽其孝之至仁之厚也及夫歲時墓祭先西後東傳於今而不墜百年來墓栢蔚茂蒼烟梨雪光動林陌識者謂君子之澤淵流而未央也時則泰和之末大安初年也迨我有元至元十五年戊寅不肖孫惲由翰林待制授朝列大夫充河北河南道提刑按察副使明年春三月按部而

南過家上塚首從二墳以封以饗其東阡則繚以短垣
周若干步武復欲發達幽光慨焉莫究訪耆舊則商年
俱盡考世德則旌紀寂寥因念天下之物未有無本而
立捨祖而豐昵者也然遠則疏疏則不親不親則塗人
此世俗之常情也今王氏二百載間丘墓移置者三始
焉西晉里再卜白楊曠分白楊而祖西河鄉勢固有當
然者彼子孫浸遠吾豈敢必其不源委泮渙枝葉扶疏
者哉惟其汧流尋源推末求本明夫當然之理因不得

親其親而豐于昵者矣後之來者能以吾言世守而不易雖百世可親也而我祖建遷之義是不可不表見于後曾祖諱經字伯常讀書不仕以仁厚庇一鄉衛人至今以長者稱銘曰

族萃蕃理則遷尊而祖獲所安論本根不易存祭先河祖所遵致時祀首遠墳取此法裕後昆繫我曾寔古人仁之厚孝之純西晉里長樂原憶墓栢鎖蒼烟鬱相望見蟬嫣孰不曰王氏阡銘貞石表先德陵谷遷庶可識

管勾推公墓碣銘 并序

公諱德字濟之姓推氏其先相州隆慮人宋季有起身
刀筆至州錄事叅軍者以政尚嚴明不畏強禦名大父
暨兄金初避仇徙家衛之共城伯祖以掾補縣吏不幸
皆早世考復字永亨時在襁褓母李氏貧不能家提之
再醮邑醫杜氏及長就傳其術遂以良醫稱公少穎異
能紹其家學軒岐雷扁以來書浩博不易究悉研窮機
要所得為甚多正大丁亥以方瘍兩科中選由醫工補

省司管勾公有蘊藉以德藝為上官推重生平志存濟物故其詮治疾症未嘗以貧富易心理或未安歸若芒刺在背隱不敢著席初貞佑大兵後比屋疫作與考謀曰今用厄如是我實司命可坐視不救遂大措湯劑歷飲閭里問其乏粥瀋者復以米遺之全活甚衆天興初盜起西山約衆東走汴中塗遇劫賊熟視為公遽放伏前謝曰推君父子鄉以藥惠脫我輩命忍以非義加諸餘亦獲免壬辰秋歸隱蘇嶺老者尊其德病者賴以安

而少者訪其學然神膏傳瘍靈丸起瘵醫家者流正有
定法而僻隱贅異等疾在方伎所無者公率能一望而
知意料而決翕忽死生之變如程氏子得腹痛疾以食
毒治而苦愈亟謁公狀聞曰此臍疽也已無及矣程不
應公曰後三日當有腐血下而絕及期果然晚節耽翫
史籍酣適醪醴浮沈得喪一寓情杯酌間或勸焉曰吾
方陶然遊太和之鄉君可去毋吮竟以飲致疾終享年
七十有二配桑氏鄉進士彥周之女壺儀母道有承平

故家風範生女子三人長適司候張顯仲女鉅家李氏
季歸王某後公五年卒壽八秩聳顯等合葬古郭里栢
門山南原殿士桑君塋西南隅實至元二年二月四日
也後十五年春憚按部南下躬奠墓次泣然興感縱羊
曇之淚下沾襟時思罔替終伯道之自遺伊戚為恨何
如惟是鑽石紀銘昭告下泉庶幾少有慰焉推為氏歷
考姓書不見惟潛夫論載餘推氏出楚之羊姓公豈其
苗裔乎銘曰

軒岐有書是為內經洞達病機惟明克能於惟我公天
稟粹靈靈九起廢神膏續肱不主故常以意智行推本
所自其源淵淳藝精多挾度貨可居高下其手類夫吏
胥繫公處心德度愉愉拯溺救焚已焉是圖相彼陽施
宜嗣厥後本支顛兀理莫可究纍纍堂封栢山南元刻
銘表公以慰下泉雖高深兮易位尚知為鄉先生推氏
之阡

故將仕郎潞州襄垣縣尹李公墓碣銘

并序

世有風誼之士粹出天稟不俟激昂藹鄉曲之譽稱於
士大夫間者李公其人也公諱瑞字天祥其先潞州上
黨人系出唐昭武公抱玉之裔五代季遠祖以官家衛
公為人慷慨有機警長身銳目髯模糊蝟磔酒酣吐氣
抵掌談話而英姿颯爽之餘猶隱然溢眉睫間少為縣
吏錄錄無所見正大間恒山公僊提孤軍宿汲連九公
聲援君時給事幕府叅軍季公愛其武幹委以赤白囊
事公感其知遇晝則荷戈捍侮于外夕則抱牘上軍務

秋間集

陳公以材辟府從事六年積前後勞赤牒授潞州判官
棲遲下位德及民為艱故寬簡持大體謙讓睦僚友聽
共佐理中多裨益了不露已出至上敬下安惟恐秩竟
而去之遽也九年夏予調官晉府過家上冢昨飲水濱
話平生甚悉翼日鷄一鳴送予遠郊外泣且言曰吾老
矣不能為升斗祿走形勢途第相見期邈未知復無恙
否遂哽噎訣去余亦款款久之且訝其遽如許也其秋
以訃來告嗚呼哀哉公事家府執弟子禮三十年始終

如一日一別終天葬弗逮送弔不及哀銘誄未彰有恨
何如嗣子震既礪石墓道百拜來請銘曰無庸固所願
也公姿孝悌喜賓客賑貧繼乏雖脫驂指囷略無難色
至於排難解紛不自顧藉猶焚溺之在已復能通下情
知疾苦姁姁款款老安少懷與人接無貴賤禮夷故牛
童馬走盡得其懽心生平備嘗世故小心儉畏以省事
為樂有訟來質成公溫言理喻曰緩急人時有也其忍
以小忿興怨可退思自省既而偕謝曰公長者過不敢


復聞又善營構事不為巧飾要以敦輦延百載上如衛之泮宮潞之儲廩是也初農民發野塚市甓下令禁焉暴委之患遂絕士人牛國瑞聞公義託妻子東遊客死聊城為經紀其家又石其氏者坐事累粹不易辨明索之急投公匿焉竟賴以脫里有喪率匍匐救視孔懷之情踰於兄弟至貧不能舉者棺衾坎塋楸拊之物必具葬乃已其周急趨難甚於己私類若此終飲德不伐閒居灌鑿樹藝麋衣糲食與老農老圃為伍殆將終身焉

噫衰俗頽波中矯矯然有古義士風出則智效於官處
則行比一鄉可謂不凡者矣士方以壽祉期公一旦暴
殞不及中壽為惑豈氣盛亟哀物剛易折推原本自理
或亶然然觀義之所在有不亡者存焉異時有帶劒喬
林讀予文而興起者未必不拜酹公墳俾配食於縣社
也公仕至將仕郎潞州襄垣縣尹命已下卒春秋六十
有四寶九年壬申七月十九日也配張氏先卒女二人
長曰阿醜女甥魏珍次未笄皆繼公沒嗣子震實主其

喪葬汲縣南唐津里清水之南源銘曰

太史著書游俠與侔不軌正理匪暴豪邪行而宜之義
莫有加李公之先奮跡將家餘烈有光流而義華故俠
焉負巨先之氣行焉佩仲由之猗家府與訓化而柔嘉
據理施惠如有等差趨人之難甚於己私孤不自存我
衣食之貧不喪舉我棺窆之野塚纍纍公助半之夷考
其行匪義則那以之蒞官敏而外和絲棼我理瘡痍我
摩方百里之命下俄春者之不歌心則罔單其如命何

念公平生涕泗滂沱番番良聲公榮實多泉流西東太
行嵯峨我銘刻石等於不磨



秋澗集卷五十九

欽定四庫全書

集部

秋澗集卷

六十一

詳校官侍讀學士臣沈咸熙

侍讀臣孫球覆勘

總校官降調編修臣倉聖脉

校對官編修臣于鼎

謄錄監生臣汪致基

欽定四庫全書

秋澗集卷六十

元 王惲 撰

碣銘

大元國故尚書省左右司員外郎韓公神道碣

銘并序

夫朝廷山林之士有往而不返入而不能出者惟其勇
於靜退貞不絕俗是則為丈夫之事吾於鄉先生韓公

得之矣公諱仁字義和父顯有融德不耀公甫冠而孤
事母以至孝稱好學強識聞一善事樂為而不厭正大
間舉孝廉辟為州孔目以能充元帥府令史方羽書交
馳際公勵精所事為上官推重番譯史安天合為相友
善壬辰北渡隱居鄉間澹然無所營庚子歲詔行臺於
燕開幕府選參佐得良能為亟用安侯薦首聘公充尚
書省都事癸卯春以國計北覲上詢以金粟川流羅圖
鞏固將何策可濟對者以十數獨公敷陳詳明簡而得

要有鑒古訓用賢材之說上喜甚仍奏天下困窮者實
繁有徒方發政施仁之秋宜子惠俾霑大賚允焉迄今
貧子月給廩料蓋自公伊始是年秋丁母梁氏憂尋奪
哀起授左右司員外郎公早夜在公以吏務自任郎中
李獻卿才望重兩朝亦許公和光解紛能就吾事又明
年冬以祔母夫人得告南歸既襄事偕內子張氏棄俗
入道號逍遙子遂西遊太華終南諸山黃冠野服偃然
閱世如老松卧雲壑者逾三紀焉公資明淑生平與物

無忤其薦賢周急有大過人者宗族藉之通達者甚衆
嘗買僮即約之曰汝等以世故不幸及此義則黽勉相
從否則任渠所往晚節專以方書濟人為事聞一秘方
奇訣求訪百至易千金不吝歲久得益多如煙霞醫林
等集悉鋟梓流布猶虞所傳未暢擇標治者遍書閭巷
壁間京師物繁歲多奇疾賴公起死者不勝紀例來謝
辭不見曰吾庶幾道念濟苛苦而已餘何計當時少傳
竇公亦以醫方談客多獵神農經所載為用公則博採

經驗所謂海上方者錄之無遺二公雖趣向不同於博
施則一也故竇韓之名並傳於世先是道人謝志賢等
歆公進退有道心存濟物殆非尋常所可及遂請主神
寶修真二觀餘三十年奉公猶一日公有二姪長曰天祐
泰鹽提舉次德旻由後衛從事充樞密院令史德旻以
公耄期迎至家庭與妻苑氏侍養送終禮無少憾士論
賢之公以至元十九年十月望日考終牖下享年八十
有四某月日將歸窆汲縣耿岡之新壠墓須銘以鄉耆

故來屬筆其敢以無斐辭銘曰

顯允韓公生有淑質陳力周行孝廉應辟移而為忠載
揚厥職濟物之心一何云亟漢署千官含香入侍經國
之對允合眷思片言回春仁者之賜脫屣榮貴神武挂
冠退身急流又人所難全真為教樂在一簞青囊集驗
救夫世瘼旁搜博施一壺市間保合太和浩浩其天我
鍊我形我駐我顏較彼獨善九鵬一鷗棲遲有窠逍遙
有篇青山白雲玄門老仙黃岡北原睠焉故山惟耿新

壠繫公改遷魂兮來歸諒先生之所安

大元故濛溪先生張君墓碣銘

并序

余官晉府者四年得進修之士一人曰濛溪張君每暇與相往來把酒論文最可尚者君無求於人人之有得于君殊沖然也私自念異時禮文興舉吾儻與當任渠責及承乏翰林君墓草已宿已未夏其子思敬來京師謁予以墓銘為請慰唁餘為歎歔者久之言猶在耳其忍以不敏辭君諱著字仲明姓張氏世為襄陵縣張相

里人曾祖諱某雅重然諾顧義所在雖死生以之祖愿父彬皆潛德不仕讀書治田子孫相傳以為家法君少穎悟不待勉勵卓然自志於學國初戊戌歲設科取士君以詞賦中選既而嘆曰士當遠大自期雕蟲篆刻將何為哉適貽溪麻先生洎前進士允齋曹丈來主經局君喜且不寐曰今而後吾學有所正矣遂刮去故習沈潛伊洛諸書雖饑渴寒暑貧窮得失不易其初心所謂道之體用文之華實探涉其源流咀嚼其膏味積而為

文詞發而為事業不盈不矜介然家居以樂育諸生為
業中統建元頤齋張公以直道清操宣撫河東廉君才行
擢主潞城簿政廉能以畏愛稱明年公見事齟齬不可
為以親老西歸有司累辟不就至元乙酉用薦者授平
陽路儒學教授於是衆論大饜士風為一變先生年彌
高德彌卽學益博文益奇士友知所依嚮吏民咸有矜
式秩竟不聽其去者逾再考厥後子思敬自南陽教官
來省聞彼中風土樂焉曰名山大川平日所願見遂命

駕南遊以至元壬辰夏六月廿六日考終寓舍享年六十有九初娶陶寺里大家趙氏一子思敬二女長嫁同邑王黼次適洪洞梁龜齡繼室曲沃靳氏孫男二曰世權世衡思敬以家學今充隆福宮宮教先生姿明亮色夷而氣清為人誠厚寡慾不戚戚於貧賤與人交始若踈淡久之愈敬而愛人百負之終不較望而知為雅德君子其成就後進為已任故晉人以文名而達者多出其門竊惟亡金百年來平陽號稱多士每歲舉子赴選

大約數倍諸郡至有白首場屋庶幾一第餘有不暇及者唯君年甫冠即能知所學所從拔出習俗潛心古道踐履外詩文雜著曰濛溪集者五百餘篇何多矣哉晉絳諸人未之有也况一辭一藻典雅有法理明辭約以自得為主是可銘銘曰

四科稱賢曰德與藝其在聖門用不偏廢文乃道興經天緯地苟遺其本剽竊何異利祿科場疇非誕誇聯綴補緝是何言邪濛溪為學其復不遐洗心程張正藝曹

麻閉門窮經其書滿家玉佩瓊琚粲焉辭華含章時發
其助也多士之生世濟時行道時既我乖立言明教生
榮沒傳朝菌夕蓼達人大觀彼此奚較大川河宗名山
華崧地靈氣異先生所鍾一朝長逝杳焉飛鴻世皆知
仁智之所樂吾獨為歸根返壑乃先生之所終凌倒景
而不滅其元精耿耿固浩乎其所不窮適來吾時適去
吾從先生之心與造物也從容失山西東相里新宮我
銘斯石如勒景鐘雖陵遷兮谷變尚知為濛溪先生之

封

故趙州寧晉縣善士荊君墓碣銘

并序

元貞元年春廉訪荊侯改道北燕過京師來謁再拜以
先表屬筆因念予與侯初定交于瘿陶一見如平生後
十年復會於東楚握手道舊勉予南行忠厚之氣藹然
萃顏間令人有不能忘者今以是來託載惟疇昔其敢
以固陋辭謹按典瑞少監焦養直善狀君諱祐字伯祥
趙之寧晉人世陶汶濱遠祖暨禰以改工是圖曰與其

供器用於一鄉曷若以善及人為愈於是板行五經等書不二十寒暑荆氏家籍布滿河朔君甫冠而孤每以保大家業為志貞祐兵起取五經泰和律義篇廣韻板闕墟壙中亂定來視盜發掘無幾君悲力補購隨復為完部或者云初藏書時善本固多唯取是三者何哉曰經者道之本法者治之具韻者字之始文籍所由生其為善已多聞者謂知本于時官府生聚雖稍稍有立詩書法律晚生後輩不知為何物一旦得是如瞽者復明

迷者之知津也而又印摸精取直廉故售者廣屋日為之潤所可重者積而能散縣人王壹者坐事累繫獄吏挾私欲死之君力與營救彼不顧且諷而徼賄竟傾貲出之渠來謝却不見曰吾區區若然者憐爾妄陷非辜餘何有壬子歲州縣通籍冒占者有禁里嫗瞽而來依者惻然以乳姆收恤轉易書輩徃徃宿負審其寔既折元券復惠之書嘗有以女奴來償者辭不克聘而遣焉斯皆風義矯矯人難能者率樂為之故鄉里無親疏以

善人稱君以丁巳秋遘疾遺命仲子元綱曰伯叔二喪未克葬汝勉襄大事以卒吾志言終而逝實是年八月八日也壽五十有九藏先塋昭穴君資和易處事明敏終以失學為愧憾及諸子長皆教之讀書嘗訓飭曰吾已面牆無及今幸嗣先業庭戶間書帙紛緇豈有資人進修賢不自力將何以免君子之譏且先世易治而裘所期正爾汝曹其勉旃君初娶劉氏繼室蘇氏生四子長國器中戊戌詞科次國用善屬文皆前卒次元綱自

幼有成人風君嘗語所親異時保家子也竟如言季幼紀為人雅重信道篤少從敬齋李先生學所得為多由典瑞貳卿擢任風憲今為山北遼東道廉訪使女一適進士張景賢孫懷寶男孫九人曰諶曰詢曰誠曰謙曰謚曰誼曰諒曰詡曰諏女孫五人一在室餘皆適士族曾孫九女孫如之於乎盛哉予然後知善惡之報至子孫而後定者審矣銘曰

緊士居業擇術是先有篤者志善乎變遷捨鈞治書理

幾於研顯允荆君思深業專誓教子而亢宗見藏書之
有權要本孝義奉而周旋萃英敷華煥乎簡編迪我後
人學者賴焉磊落載腹宛從蹄筌積厚能散憫窮拔冤
不有其祉委順百年慶流後裔子孫蟬嫣人定彼勝其
然亶然二子翩翩遺珠在淵仲克世荷愿而稱賢季由
近侍三使輜軒較夫善利孰大斯傳固惟自稽古之力
實資藉之所緣欲報之德有昊者天刻我銘章于晉之
阡邇追來孝以慰下泉異時推耆德而祀鄉社尚有攷

于瑤鵠

洪岳老人石琰公墓碣銘

并序

公姓石琰氏諱德玉字君寶遼東蓋州人疎髯炯目氣
骨臞清超超然如萬里之鶴貞祐初以良家子從軍敘
夏折橋功得官積勞至武德將軍北渡後歷仕在相衛
間母杜氏唐相如晦後公天性能孝愉色婉容斑衣垂
白朝夕孺慕雖菽水無餘有南陔白華之志時杜氏壽
登八秩清修絕葷茹素日庭除間生白菌百餘本掇去

復茁者數月人以為孝感所致時名公贈詩有似憐甘

旨闕春風茁玉芝之句

闕

趨人之急逾

於已私至遇不

闕

竹木花石時釀名

酒客至輒

闕

而後已眼花耳熱與

之扶策

闕

之某處手植而即蕃者

也此

闕

眇柯怡顏喜津津溢眉

睫間曰吾且

闕

有

闕

不

闕

壁矣嘗種竹當戶或謂太

迫曰待其藂茂秋霽月明之時俾清樾透簾為此君寫真

耳故終日脩然對之揮灑為樂其清澹如此晚年游心
命書人有問必以修己安分為答能此不待孤虛旺相
吾言固有徵矣歲丙子公年八十有五嘗繪洪山歸隱
圖以自歌其所樂因號洪岳老人是歲冬灑然而逝若
委蛻焉孺人劉氏能遂公初心主治中饋不知其為貧
家也生女子二人長適御史康天英次適河東道提刑
按察使姜或家府與公交款曲篤世契三十年一別終
天有恨何如尋步入街西故里眄睠竹樹慨然有聞遂

懷人之愴老淚濡毫而有斯作銘曰

貧而樂有類乎黔婁安而隱似慕夫德公事親極融融
之樂逢辰出蹇蹇之忠布衣歸來默而自容將徘徊而
孰友侶藁筠而伍岳松生也順事沒寧吾躬古之所謂
鄉先生死而祭于社者其處士之堂封乎

大元故廣威將軍寧晉縣令李公墓碣銘

并序

公諱讓姓李氏其先易水黃山人也父海資善良世樹
藝為業公既孤母張氏以儉持家就熟南遷至寧晉唐

城鄉愛其風土遂占籍為縣人公初生顱骨有異狀及冠美鬚髯聲音如鐘為人善騎射勇於赴義為一方推服貞祐初河朔失守所在寇盜充斥日相吞噬公慨然輟耕墾上團結鄉豪游獵陸澤荆藿間以保庇井邑為事蓋有所需以明歸附之志歲己卯天兵南下公與兄直首率里人迎拜耨埒諾延於軍門嘉其效順授直行寧晉縣事公管軍總校仍聽元帥蔡國公節制時歲荒民饑道殣相望田東有水柵曰歷城大澤瀾漫周浸百

餘里菱芡魚鳧資生之物甚富民往依大獲厥所庚辰
秋金冀州將柴茂以兵來取兄與公力戰而前直死焉
公憤大兄敗沒衆又失所庇以圖報復瀝血為誓雖食
頃不忘也繼從縣長王帥復奪其柵居無幾茂復合大
勢來爭前次滿氏公聞之盡匿精銳于歷旁二十里叢
葦間以弱誘茂令之曰伺彼過聽金聲而作親驅數百
人前逆鋒纔交即佯北逗茂逾紀氏塢金鳴伏發茂腹
背受兵大挫其銳公回戈追奔五戰皆捷自是冀人聲

燭不敢復窺潯垠矣歷城用以全安帥閫酬勞授主本
縣簿乙酉冬武仙以真定叛麾下劇節副鄭進等乘勢
剽掠趙癭陶迤東悉為丘墟公度力不可支收合餘衆
乃與鼓藁二主帥合勢併破劇鄭諸砦馘數百級而還
所失保聚生齒皆得復故丙戌冬仙復令劇鎮戍趙州
明年春從大兵規取克焉時太師穆呼哩以奏得專封
拜錄公前後功授公行鼓城帥府右監軍並授銀符使
顯異焉既而陞充本縣令以寧昌為世封於是招流亡

布恩惠畫井開起市集廛居有貿易之利田里無追呼之擾四民樂業外戶為不扃矣又為勸田務抑游惰扶寡弱治姦蠹是又公之所必行而求自慊民有衣食不自給者公發私藏以贍之富足帥府聞之為復其三年貴矣公必耕而食蠶而得衣居常以榜揭門扉私囑干謁請無相覲其廡守如此癸丑春以老致仕令男天澤嗣職優游里社日課子孫耕鑿為務嘗斧桑田間或勸之公曰官時來耳為農吾家素業我若爾兒輩尚惰而

自安或者謝而去古人稱貴而能賤丈夫之事公其有
焉以至元十一年十月廿二日考終牖下享年八十有
七越四月葬縣西北下王里之新塋禮也祖送者幾萬
人夫人宓氏趙氏張氏子男六人長曰天澤歷寧晉元
氏兩縣簿次天祿本縣鄂囉千戶次天祐監寧晉酒次
天祚不仕次天祥次天祐某鎮巡檢女四人長與次俱
適趙氏次適牛氏次適郝氏男孫一十九人女孫一十
三人重孫男一十八人重孫女一十三人初公畜家僮

數百指悲縱遣為良曾無驚身分役之責人又欽其德
厚云天祿性孝義伋伋有父風以孟舊塋屢為滹浸所
留遂改卜於此既襄事贄禮幣百拜來請銘予方問俗
浹濱見其遺黎故老脫離兵革六十餘載猶為懷思王
李諸人眷眷不忘有配社尸祝之報嗚呼貞祐之亂可
謂離且瘼矣元元之民莫適所歸不為人所魚肉必轉
死溝壑如王李諸公雖奮棘矜起隴畝至于父子昆弟
出死力角羣豪經營捍蔽使一方奠安又識夫天運所

在挈民去危邦而就興國誠亦出人意表一時賢豪者
也甫定後復能俾官府生聚日就完好今歷官鄉曲歲
時拜墓于于而來者皆曩時不能自存之嗣續也其德
民之厚感民之深又何止童不雉捕長江之虎渡者哉
其宜子孫繩繩螭螭皆有所立然後知德施于民功被
一時者天之垂報何其豐且阜哉銘曰

瘞陶北郊里號下王顧瞻佳城蔚乎蒼蒼是為晉長李
公之藏惟是李公千夫之防果毅之勇木訥之剛奮身

隴畝舉圖義匡貞祐南播雲擾之俶割據侵陵互相魚
肉民匪殲夷轉死溝谷宛彼歷城居水之腹菱芡魚鳧
大益不足聞公來依襁負相續如鹿走音如鳥棲木四
境騷然獨為樂國耿氏昆仍旌旗部曲既復兄讎又知
所屬草昧初分官府始置戢我武幹明夫吏治內守以
廉外方以義撫循有方興滯補弊扶弱抑強繩姦束吏
百戰遺黎竟保終惠民之戴公頌聲噦噦尸而祝之懷
恩罔替勒銘豐碑尚克永世

大元故河中府南北道船橋總管謝公墓碣銘

并序

公諱某字仲進其先燕之香河人世守儒業父某金吾
衛上將軍河東路總帥公其仲子也為人性行淑均沈
實有顧慮既冠嘗從父西破川蜀每領牙隊居前當破
竹際掩目隱心未嘗以嗜殺為快雖執訊獲醜力為全
活者甚衆用勞充秦鞏路軍儲大使辦集有方餉道為
不乏丁巳夏先帥薨君實主其喪縗杖瘠立躬起塋壠

棺衾儀物既易可觀會者大悅復樹豐碑昭德神道具
表新阡有光焉大兄維石襲父職歿軍中行臺檄君以
例繼執不可曰兄念天顯極友愛顧某不啻若手足然
家事一聽予處鞠立之責正在今日竟以其嗣往代其
適追永言之思友于恤孤之義蓋終身焉然其過於人
遠甚者多類此晚節以故侯失將駕下澤乘欸段遊居
中條田間耕牧卒歲裕如也至元己亥冬十二月廿有
六日以疾終平陽府崇道里私第之正寢得年五十有

五官至河中府船橋總管越三日厝於府東神泉鄉之
南里原從遷壠也萬口稱惜咸以善人歸焉夫人劉氏
晉之平陽人德柔嘉主內事殊嚴生三子長曰純克家
有立志次曰繹謹愿盡子道季天女一適裴氏子孫男一
人未名既卒哭嗣子純來求表其墓道予私念其故昔
孔子遇舊館人之喪脫驂馬以賻曰吾惡夫涕之無從
也君於予西道之主人也從游讌語姁姁然蓋三年於
茲殆非過客之有頃其可辭不敏君生長秦晉出身軍

旅間而禮度雍雍不知為將家子與人交信而誠人無有間言其在諸弟間棟華輝映惟恐弗及又出天稟粹然也嗚呼以君之德之壽較之有不相稱及者仍哀之以詞銘曰

蒼茫兩間生也倏寓一氣之來命有定數彼修短予奪理則有之若不繫夫積習善惡之故嗚呼謝君一債而去孝友淑善曾不終始淪素天之報施如此豈定者不可奪來者固所與也將子孫延昌以永其終譽邪吁

故將仕郎汲縣尹韓府君墓銘

并序

府君姓韓氏諱澍字巨川其先陳留酸棗人世以儒業
顯遠祖有方官至大司空六代祖璫累階銀青榮祿大
夫五季間北渡河遂占籍為衛人榮祿生朝奉大夫祗
德朝奉生八十一秀才奕山山生渤亦舉進士渤生柜
善居室遂用富饒於君為曾祖祖悅有淳德不耀父仲
字仲寬所居以善行稱君自穉齒性沈潛寡言笑羣兒
劇里中過不少睨宗黨異焉少長以刀筆起家用言者

為安陽吏主掾以能入為府屬吏丙辰歲朝廷以相之
五縣封太弟為采邑繼郡帥例肆覲君毅然以民計從
行及數對稱旨擢為本府戶曹孔目官明年春降璽書
起聘君太原高公鳴為彰德路總管遂汰冗員擢羣能
新舊圖至設府史不數人君首以才選無幾轉案牘提
控官夙夜在公勵精所事閱六歲克勤猶一日大為總
尹所知轉錄事叅軍至元二年轉官制行積前後勞授以
縣尹下車首以美俗勸農為務顧謂寮屬曰富足者禮

義之資耕桑者風化之本至于飾亭傳謹迎候奉上官
徼目前之譽非吾所知也於是下教條課戶丁斲蕪薄
植桑果以敦大本非農隙不許入城市暇則行縣檢視
勤惰而賞罰焉自是原隰昫昫榛惡為之開鄉隣有以
忿鬪訟於庭者君曰孝悌力田親仁善鄰古之善道初
無大故何乃至爾諭而遣之至頑不率教則曰聽兩造
明曲直是不難恐一置于罰終身玷辱為鄉黨指誚吾
惜汝者此也儻不吾念論如法比秩滿五事備舉所獲

來暮之歌厥聲載路矣五年用新銓法勅授將仕郎主
高唐縣簿凡九月興疾歸明年卒於絃歌里舍得年四
十有八實至元庚午春二月一日也越十有九日從葬
安陽縣西陵鄉武官原之新塋母李氏時年八十拊柩
而哭之慟曰天乎遽奪我純孝至此酷乎聞者憫其賢
孝縣君金相人進士秦公之孫配君德良稱生子男三
長曰從益自憲臺六察史今為燕南河北道提刑按察
司書史次從愿從革女明童適王氏子男孫四人後九

年歲戊寅冬十一月七日終祔安玄堂之左禮也初縣境夏大旱比致禱私念事之壅底獄之鬱滯亦沴氣是致乃裁決牢繫為一空及禱蒼山祠雩舞未收雲幢幢起中豁翼日雨盈尺繼謝祠下車還衆曰尹精誠若是當有回馬雨表公虔至半途果然尋鄰道以蝗災告備已而竟不入境縣狀其異以聞是秋為有年君溫雅有沉量慮事遠善措畫臨政暇裕略不動聲色亦未嘗矜喜以已長掩物其孝愛友悌出天秉粹然不忍一朝違

母氏側嘗行役逾時眷焉陟岵寢餽為不安於承顏孺慕若此其至初見弟季既多枝葉蕃衍門戶事繁重故挺身吏案盡心所事匪厥躬是私期於庇本根寬父母抱者幾三十年若府君者可謂克孝克恭念顯養志者矣某祖妣韓是為君女叔曰女叔者稱父之妹也出六帖君之嗣從益次某行為外弟一日跪而請曰先人棄養奄踰八年坎不及誌有銜未祛唯是表於墓左者又闕罪惡之大無可言若銘則尚於兄焉有託某追惟祖妣平生之言得君

行為最詳因繫之以銘銘曰

於鑠韓氏世為儒之宗兮彰纓若綬揚歷位乎公兮猗
嗟裔孫掾習匪其躬兮黽勉從事養夫親之志兮庇我
本根殆葛藟之義兮聖哲所稱吾今見其人兮於穆府
君諒彼古之倫兮兩漢循吏鑄頑以成仁兮嗚呼令尹
誠亦吏之循兮予銘撫實其敢過為文兮魂而有靈尚
懣嘆之一呻兮

秋澗集卷六十

欽定四庫全書

秋澗集卷六十一

元 王惲 撰

碣銘

故善士張君墓碣銘

并序

善士張君諱從禮字仲和順州龍山人大父德仁有耆
行鄉人尊敬之禰義當任燕工技府總管既老君當襲
職請於府曰親老需倚余志已定弟從順賢而克荷願

畀之竟以從順嗣仲和姿清介不隨俗上下嘗從澹泊先生學詩甚自意也事母教弟以孝友聞承顏讀書外室屢空宴如也君既不樂仕進嘗曰菽水盡歡不害養志三釜五鼎非所願也至傭筆以供朝夕平生友非逾已而不交曰吾將安倣施非當受而取曰畏將曷勝弟從順洎婦併歿孤姪敏方三歲為鞠育成人過於已出至贅子智於友生羊舌氏家仍為敏納室是亦人難能也詹事張侯高其孝義憐其窮獨出楮幣數千緡付之

約得子錢悲助親養君以義重德薄謝弗敢當郡國知其賢以孝廉累辟亦不就臺憲廉得其實施焉復之終身君悚然嘆曰人子奉親理固當然因有加邦之教也顧從禮何足以為勸其自處明分有如是者所居曲水里有事告值花

闕

挺若儼侍溫清假日我其

間有問者

闕

事子姑去自號栢溪主人左

山商公

闕

得贊之

闕

京師之明年君

來謁

闕

見眉間今雖已矣

尚能

闕

以孝止善者也至元癸巳

春母氏弃養以哀毀致疾是年冬十月三日考終牖下
得年五十有六配劉氏亦能安君貧窶早世生子智及
二女適裴氏王氏再娶董亦前君歿生子曾葬檀州密
雲鄉之王冢原友人劉某重契義介嗣子智請表其墓
以君篤行有類古人者為之銘銘曰

堪輿兩間子職不易孝為化原融而友悌君於二者行
不少匱濟以廉貞大錫厥類目為善士吾言匪比其善

伊何可欲之謂況乎質美而學行方而義緊匹夫而化鄉人曾克施之弗異五十六年為樂也洩洩去水來山密雲之隰隱然斧封山豕屹立是惟吾曾張仲之室過者必式

後漢張霸性孝讓舉動合禮鄉人號張曾子

故雲中高君墓碣銘

并序

君諱祐字仲和其先雲中人高祖已來遠昭穆無可詳者伯父與考金季家撫州以財雄邊伯父德真字伯諒潛德不仕考諱德榮伯寬其字也姿醇厚鄉黨以德人

稱嘗以勞權豐利酒伯母暨君之妣皆張氏女以娣娣而列妯娌伯生子曰信字仲禮曰義字仲仁信美丰儀虎睛豐頤載珠赴海以樂終君實仲之嗣貌敦龐性孝悌及長雖混迹闐闐衆不敢以尋常期初燕雲失守豐利府君避地南還汴梁壬辰歲例北徙以實衛墟君與兄信素負心計相與謀曰衛居天中寔通都劇邑百物夥繁合散於此若以什一與時馳逐可致屋潤遂主貨殖為業君為人篤信明敏不底蘊留既易彼取此收息且

廉故聲實四出商販輿集其門貲既饒足不忍顯利自
濡以東多鹽寡為得每每貸子錢有不克償及羣居邸
舍積僦直而負者審其窘悉折券無難色由是三郎以
長者稱於中外至元十九年五月四日以疾終于家壽
六十有五三日葬汲縣汲城鄉南王里之原從新阡也
配張氏與君德良稱生四子長曰明福以通幹由泰鹽
管勾任河南府交鈔庫使次世英世顯世昌孫二人曰
蔓曰莘姪三人曰夢得鄉貢儒士前君卒曰世傑世寧

姪孫二曰革曰華重孫一曰復亨明年明福以墓碣來
請銘余以同里巷者五十年知高氏為最詳即其富潤
齒息而論蓋自高曾而降凡六世雖荐更世故以孝義
勤儉同居不析故也至君承父兄餘業益光大於後內
則齊理嚴肅以身率先族屬家僮千有餘指無間言日
趨事惟謹屋廬被服務從朴素常以驕靡為戒外則持
心近厚與物無滯敬畏官府奔走輸辦未嘗少厭所患
謀生之不勤胡恤王事之時亟也自壬子通閱後高氏

迄今為河朔名族之冠豈偶然哉故遠服賈者雖千萬
里外念寬厚饒裕獨以高氏為讓矧高氏以義致利義
重於生因貲致富富而不驕為子孫又能求銘以昭世
德是又好禮而知本者也焉得辭銘曰

惟富壽五福先匪欲厚能畀全有高氏起雲燕凡六世
財雄邊至豐利始南遷編衛氓迹市鄺居家里無間言
我屋豐利匪顯益寡乏貫子錢長者稱動河壖供厥賦
日翩翩曾不憚生勉旃業攸久族蟬嫣服而食恥華鮮

孝與義為周旋勤不匱理固然繼之者當鑒焉行山秀
淇水淵高氏裔與並傳

新鄉縣尹劉君去思碣銘

并序

衛之屬邑曰新鄉者其地距太行東麓桑土衍沃浸以
清泉之潤民俗敦阜自昔號河朔望縣惟其物廣而訟
囂路衝而務劇故治稱為難然渴餒而易飲食者民之
心也得其人苟有以拊而安之將見民戴之如父母仰
之如神明惟恐來之暮而去之遽也維至元之六年南

宮劉君理由江淮漕幕來主縣治君姿幹敏有機警相
時處宜果於裁斷既視事思有以事集於上民便於下
於是舉條章明約束均賦役却造請凡轡馭之急遽者
馴而致之不務高遠率先以身為度縣當闕陝驛程使
驛轉致日相望於道吏民疲於供頓君量其輕重處之
有方無名而求索者皆以理謝之故乘間侵牟之弊日
就斂息解舍一縣具瞻陋不克治事非所以整暇也計
材庀工易故而新增葺者十餘楹復起蕭相祠俾吏曹

不自鄙薄以信景慕邵公橋跨清水上歲久墊齧兢於
履危乘隙大捷砮鉞斧官柳為梁方之舊締既高而固
役不知勞而民免病涉至治道塗取通快堙汙夷峻徒
行輦致坦不少阻歲時劬農裹糧自隨周行田里未嘗
追呼俾妨時作耕稼蠶績檢括課視切於已私復諭之
以勤儉申之以孝悌使遷善而遠罪由是邑里感念勤
於作勞生理且滋殖矣下迨鰥寡顛連亦行得所流逋
聞之稍稍復業故賦稅輸納不及期而辦詞訟繁囂不

侯約而簡君以令行民信教烏可後乃出已稍崇飾廟
學如葢瓦級塼之破壞者丹堊漉漫之不鮮者一完而
與之復葺黼座陶祭器周繚室垣外障儀閤春秋釋菜
禮容為增肅暇則禮師儒率僚吏暨邑之子弟聽其講
說使知所務故三載間庭無留訟牢戶為屢空至隣有
疑讞滯而未決者上官倚之不蔽而縣之治否為可知
已君既更耆舊苗仲牛古麟慕賓羅從玉郭昌祚席安
等懷其夙愛有思罔置者來謁文以垂示於後辭再四

不克仍覽觀件狀而次第之且寓夫余之所感焉嘗觀
兩漢循吏政顯風化子視生民訓牖惠養如恐不及凜
然有三代遺風惟其決洽於民者深至故所居即化所
去見思有起祠樹碑以表夫永賢載道之意非幸也宜
也迨叔世司牧者昧於治體苟簡貪墨習為當然其可
見者不過曉簿書以為能飾矯偽以干譽其於民之休
戚漠然如秦人視越人之肥瘠甚者因之以急張臨之
以形勢剥民之肌以膏其身傾民之產以肥其室使民

畏之甚豺虎惡之劇寇讎告訐謗譴無所不至以理勢
論之亦宜也今劉君以勤強幹敏力矯時弊致績用章
著吏民稱道如是可謂能也已
是宜銘銘曰

天下之事孰覈孰綜政發於上相臣是控事終于下疇
致厥用相須成務匪令奚共雖百里間務實煩閔有社
有民有賦有貢兵之貪難民之疾痛期會簿書風俗獄
訟我剖我決我承我奉粵惟良能治之有統千室鳴絃
五袴流頌以致朝堂令無太僇庶事日康四方風動

增秩賜金璽書褒諷緊爾責望得人為重暨暨劉尹事
功自意挺身顏流卓爾為治不務高遠不涉苛細相時
致宜因利而利瘼自我蠲聲由實致所以懷思去而罔
替截鐙願留非愚敢覬胡若稱述垂聲來世刻石縣門
永照鄴衛

故太一二代度師先考韓君墓碣銘

并序

君諱矩字某其先為大梁望族曾祖璫五季時官司諫
以銀青榮祿大夫致仕避地北渡遂占籍為衛人祖亦

大觀末舉茂才數為縣有聲父渤金初登進士第有文
采終獲嘉令君自少以疾不仕資慈祥家故饒財心樂
施與凡親舊貧窶里喪有不克襄事者至傾刮橐篋以
賙其急或者來謝曰非初心也鄉黨以長者稱天眷間
太一始祖真人以神道設教遠邇嚮風受錄為門徒者
歲無慮千數君舉族清修信禮為尤至香火之奉雖寒
暑風雨不爽厥德已而君內子閻以嗣事為禱真人篆
丹符令吞之且曰汝家積善久當產異人既誕師果有

奇表真人目之曰他日輔興吾教者此兒也甫免抱即
留養道宮三歲識字七歲善書既長儀觀秀偉慧悟絕
人批答辭章捷若影響由清虛師主盟法席二十餘年
輔興之言有充而至於極者今追定仙號曰太一二代
嗣教重明真人由是而觀韓氏一門之積其來固遠以
有是子而論之君之德槩可見矣雖年甫中壽師易韓
為蕭至於克荷玄綱光隆教本在韓宗亦為不朽君既
歿重明躬葬君於四門里祖塋之次母閭氏祔焉禮也

六代度師全祐顧惟傳嗣之重猥及微末將何以圖報
維是師真所從出者其潛德幽光表而銘之中心庶獲
少安乃以刻文來請師於某祖妣妙清君列叔父行義
不可辭遂叙其世次而系之以銘銘曰

作善降祥長惡得厲在理必然隨感而至赫赫韓宗德
顯河衛衍慶及君濬而濟淪俟著而發乃生異人異人
伊何太一次祖提挈玄綱鵬騫鳳翥庇及本宗光隆丘
土松栢蕭園連岡接武神格仙遊有來容與風駕雲軒

同翻共馭純化追遠歸厚來昆沂流尋源以表道根勒
銘墓石永賁四門

太一三代度師先考王君墓表

君姓王氏諱守謙字受益博之堂邑人世以播種為業
致資產豐阜田以井而計者九桑以株而會者蓋萬數
焉遂為里中鉅家然闔門善良薄於世味奉道之心亟
若饑渴聞太一教以符籙濟度世厄所在奔走惟恐其
後君乃與其配李氏欽挹真風不遠千里求為門弟子

量家歲費外悉以贏餘為本宮香火供有子曰志沖即
今太一三代度師也師生而岐嶷七歲出就外傳應對
進退皆中禮度及毀齒善記誦喜讀老莊等書初君董
田務於野午憩蔭下寤寐間若聞呵喝聲見數青衣人
導一童子前來且曰天仙過此可少避恍視之無有適
師持壺漿來饁君異而出口自度是兒恐終非田舍
中物也及長父兄與議婚不許曰去家入道乃所願也
遂禮二代師為黃冠以經明行修得度入道士列既嗣

法席遭遇道陵特賜號玄通大師君聞而喜曰天仙之異誠有驗矣且曰平生奉道獲此實報王氏為有後矣享年七十有六考終牖下師以禮葬本縣王莊里祖塋之右母李氏祔焉今度師勅定仙號曰體道虛寂真人其師真之德靈應之蹟詳見墓碑茲不復云六代度師全祐嗣教之七年自燕命提點張居禮等以禮幣來謁且致其意曰道家者流雖崇尚玄默而太一教法專以篤人倫翊世教為本至於聚廬託處似疎而親師弟之

在兩間傳度授受實有父子之義焉今三代師真其在
宗門表墓有碑嗣法有傳可謂光且顯矣然物之在天
壤間未有無本而出者今未有餘榮而本為寂然豈厚
人倫輔世教之理哉敢百拜以表辭為屬幸憲使無拒
予以師之言誠為知所本矣遂諾而作之表

故真靖大師衛輝路道教提點張公墓碣銘

并序

道有綱紀需人而後弘如上承師真下綜法務以公材
吏用而開玄佐之功者其鍊師張公乎公諱善淵字幾

道趙郡平棘人生有異相比長言灑灑有序父溥嘗任
衛真縣酒坊使時太一四代祖中和真人提點毫之太
清宮溥素挹真風日侍師於几席間沾沾然而喜曰吾
見師聽以說遂叅禮為門弟子中和人品高邁道價重
一世與游者公卿賢士夫一動靜語默皆中倫慮公親
炙既久日有所得與之俱化若時雨然歲壬辰河南大
兵公與中和隔離者久之既而聞師北渡稅駕於趙迴
奔奉焉師忻甚曰奔走疏附吾宗門有人矣即令知太

清觀事丙午夏四月侍中和赴太后幄殿及見亦霑寵
眷奏受真定路教門提點仍賜白錦法服命侍中和頒
錦幡寶香於崧高太華二嶽以祈福祐時衛之祖觀兵
燼後鞠為草棘中和畀之經理不三數年神庭燕處頓
還舊觀壬子夏六月復從中和北覲嶺邸加號真靖大
師改提點衛輝路道教事甲寅歲復奉旨致禮嶽瀆
癸丑冬詔天下名師赴燕長春宮修羅天清醮公奏五
代貞常真人與會其所以致顯宗教推轂嗣師高出衆

表俾道流光闡公力居多己未春上南巡臨幸壽宮時
公以疾不克朝謁上言念舊眷命近侍存問仍賜御藥
葡萄酒服之病良已故中統二年換受宣詞有云操持
堅正祭醮精嚴隨師遠覲於闕庭奉命敬祠於嶽瀆已
加玄號宜煥新章之旨道論為榮焉公資清峭貞幹臨
事敏而善斷馭衆肅而有方雖一言話出人意表不肯
碌碌混常流中生平憲讀書於老子最有得故行已接
物多掇其微妙至於禱禳醮祭內嚴外辨綽有餘裕兩

從中和北上沈幾先物往返萬里無不如志嘗奉旨給
諸道度牒鶴馭所經例有贐公略無私焉其清介遠大
又如此壽七十委蛻於太一順事齋室實至元乙亥正
月廿五日也越三日陪葬祖塋之次後八年六代祖純
一真人念公有力宗門在玄士為傑出有不當泯於後
者丐予銘之以識墓竈因撫其行實而系之以辭銘曰
真靖受業始於中和荆璞雖美器成琢磨東瀛北渡載
造玄科用匪其人道將若何公綜玄務辦於益多龍庭

再召萬里周旋竹宮咸秩羽服雲闈尊師顯教我力孔
宣玄綱張弛委曲而全道價軒輊濟之以權千塵而下
歎其才賢僊游有限道館驚捐跼石紀行以大斯傳雖
高深兮易位尚知為玄門之玄

提點彰德路道教事寂然子霍君道行碣銘

并序

國朝甲辰乙巳間鹿庵先生教授共城不肖亦忝侍几
杖時有為全真學者重玄李鍊師自相下來買田於卓

泉立棲真別館既而重立北歸委紀綱士霍君明道為之營建不數年朔堂殿廊廡煥然一新際泉兩溪盡植巨竹陰翳數百畝中構筠溪亭招致吾徒徜徉笑傲其上由是卓泉道院聞於遠邇遙名洞天福地之末維重立則始之勤而霍君明道實有力焉師諱志真號寂然子明道其字也系出安陽縣秋口農里大家父諱澤嘗夢一麻衣道士云自天壇來求託宿許焉寤而誕師幼不好弄寡言笑既長性淡泊不樂榮利弱冠辭親學道

父憶夙徵即允其請延詣相之天慶宮禮重玄子為門人全真家禁睡眠謂之消陰魔服勤苦而曰打塵勞以折其強梗驕吝之氣師從事於此者閱三十寒暑略無憚色重玄驗其為受道器命主治玄門事挺志誠確措畫井井有法及卜築蘇門委之輔敦教基弘演宗緒俾特達而有所樹立焉師披荆榛掇瓦礫攻苦食淡擴充師志復闢農畝創水磴廣資生理培植教本致遠邇尊禮樂者日衆至於齋廬深靜井竈修潔遊人過客如歸

而仰給焉道俗推舉任輝之威儀師滌除玄覽痛自澄
治務正己以格物有辨訟者率用理遣不知官府為何
事羽流敬安一方凝重至二十載之久年踰耳順相之
民宿仰道價請主天慶宮既至受提點彰德路道教事
凡十有三祀年尊德重不俟言論而衆自化服以其年
月日沐浴易衣冠無疾而逝壽八十有一葬安陽縣王
裕里重玄仙冢之側師丰度清逸若山澤之臞外朴而
內敏質直而尚義簡重自居處事得時措之宜和同光

塵接物無徇俗之弊其訓導徒輩言約理到以身為律
度可謂純乎其純玄之又玄者也門人杜志用夙承提
誨圖報無方琢石紀銘期傳不朽乃介太一純一真人
李公來屬筆予既重李請又與師有夙昔之雅既叙其
行已而系之以辭銘曰

道之大原玄文五千誕誇索隱匪其正傳質稟貞素心地
善淵惟畀也全內思靜專耕田鑿井順乎世緣修己求志
繕吾性天無欲觀妙是為道之自然尚無往而不可孰間

朝市之與林泉若人者雖乘化而委蛻安知其精純之氣不
乘冷風而仙耶門人攀慕向雲蹁躚勒銘松臺何千百年

凝寂大師衛輝路道教都提點張公墓碣銘序

師諱居祐字天錫世為汲郡人父道用居樂善東北坊
以茗飲為業師早失怙恃兄居仁訓育有方甫長愿立
如成人然向慕玄風亟若飢渴思得大宗師依歸以果
其腹歲壬辰天兵下河南時太一四代度師自拓城北
渡應大將薩濟蘇請主新衛昭順聖后祠居仁舉家崇

奉遂命師為門弟子居無幾何度師北遷住趙之太清宮以師童侍有年謹敬不怠念焉遂度為道士俄命掌觀之廩料出納詳明儉而中禮曾無撮龠之悞度師稱其能時衛之祖觀兵後燬廢掃地度師遣提點張善淵詣衛興復且請師以佐葺理允焉師為戮力從事小大之役率以身先之既而張侍鶴馭北觀營建事師獨任之不十稔壇殿齋室下暨庖湑庫廐井井一新己酉春中和真人還衛顧視喜其得人己酉冬中和昇寂師辦

易葬事焦勞為多丁巳冬以事召赴行殿勞歸霑衣幣
有加還貞常真人以師貞幹有節命知宮事繼陞充提
舉中統三年上遣使植碑壽宮師復趣辦不踰其素於
國事有光至元十九年六代純一真人嗣主法席以師
道行純粹勤恪有功言於朝宣授凝寂大師衛輝路道
教都提點七年間道流推服教門增重焉廿六年二月
五日得寒疾再宿談笑而逝及斂予臨視面如生吁亦
異哉享年七十有二越七日提點范全定等葬師於四

門里祖塋之側禮也師為人樂易無機械苟有過須問
之人而無憚於改不然咽若有物所梗其歷事三師前
後五十餘載護道服勤始卒德不與純一真人以予鄉
曲故持狀來謁銘因憶十九年冬予寓大都道宮適師
與會宵永無寐龕燈爐火尊俎談舊嘗及萬靈坑事悲
世故之無常悼逝者之如是淒然動華表歸語之感故
師每歲例清明後一日丐斂酒肴楮幣等物斗量車載
展祭冢次以慰鄉梓冥漠之魂惟恐其心之不盡也其

於存歿兩間亦追遠歸厚之意也歟是可銘銘曰

太一設教幽顯兩通凡曰云為須人乃崇猗歟張公德
度沖融致身福地逢教之隆敦兮若朴發之天衷寂不
俗絕勞而有功師事三葉罔異初終一朝委蛻為報何
豐祖垠之東萬栢葱蘢陪葬其側若堂有封鏡銘表石
永示無窮

故卓行劉先生墓表

先生諱德淵字道濟襄國中丘人性癖直有操守好學


能自刻厲及游潯南王先生門思索辨惑等說自是饜
飫史學為專門之業古心古貌非禮義不妄言動一介
不取於人朋友死雖千里遠徒步必至覩前賢竒蹟偉
行擊節嘆賞而不能自己至椎耕牛以饗賓王殺乘馬
而祭昭烈其或憫時之艱急人之難切於己私而不置
也始則人大以為異既而疑焉終廼嘆服曰先生篤行
直躬守死善道者也北渡後赴戍戍試魁河北西路逮
中統建元三府辟其行能授翰林待制晚節知圓鑿方

枘不能與時阿匿乃以所得成就學者立言傳後著三
為書數萬言其說為天地立極為生民立本為聖賢立
法敷析溫公通鑑數百條枝翊章武俾承正統及見考
亭綱目書多所脗合沾沾而喜曰吾天地間可謂不孤
矣又通古文奇字士多傳習之凡經指授者類節目礫
砢表表有所立或惜其獨善不顯諸用然振衰善俗激
厲後人多矣太保劉公左轄張公以鄉曲義來周卹皆
却之曰吾非踴躍涼涼閭然媚於世者也至有以禮願

交而弗之允者許魯齋每道邢必式閭致恭而去壬子
秋不肖始覲先生於昨對榻學館夜參半歛起撼予曰
吾於漢丞相亮論議際有所得惜不並時當有說云云
至元壬午予按部夷儀謁先生於天貺齋棲遲蓬華心
融一天自樂其樂英發之氣至老不衰問先生近何述曰
適作四凶辨天府七星挽章予以張皇幽渺振濯精靈
一何壯也臨訣握予手曰吾耄矣斯文未喪子其自勗
行有以畀之既而聞卧疾慮乏調養詢諸友生始知先

生有子樸早世女孫一適康氏子新婦女孫皆不聽侍
疾卒年七秩有八時至元丙戌九月廿二日也葬蓬山
之西丘後十五年晚進王寧合鄉國議來請曰先生學
貫三才養素丘園行婉於古人望高乎一世沒當易名
用垂先範予謂寧曰士風之不振也久矣道義之斲喪
也微矣安得高風苦節如先生者哉昔孟東野以詩鳴
唐張籍私諡曰貞曜程伯淳以道自任潞公揭之曰明
道今扳二例如以卓行加之則名與行為顯允矣門生

民部尚書戎益將礮石表墓以圖不朽大德三年龍集
己亥仲冬吉日翰林學士中奉大夫知制誥同修國史
秋澗王惲為之表



秋澗集卷六十一